



Utoqqalinersiaqarneq pillugu Inatsisartut inatsisaat nr. 20 23. November 2015-imeersup allanngortinneqarnissaa siunertaralugu Naalakkersuisut peqquneqarnissaannik Inatsisartut aalajangiifigisassaattut siunnersuut. Allanngortitsinermi utoqqalinersiaqartup aapparisaata isertitai naapertorlugit utoqqalinersiaqarnissamut naatsorsuunneqartarnera atorunnaarsinneqassaaq.

(Inatsisartuni ilaasortaq Mariane Paviasen, Inuit Ataqatigiit)

(Siullermeerneqarnera)

Utoqqalinersiaqarneq pillugu Inatsisartut inatsisaat nr. 20 23. november 2015-imeersoq kingusinnerusukkullu allannguutit ilanngullugit allanngortinneqarnissaannik Naalakkersuisut peqquneqarnissaat pillugu Inatsisartuni aalajangiifigisassatut siunnersuut. Utoqqalinersiaqarneq aapparisaat isertitai tunngavigalugit allanngortinneqartarunnaarnissaat anguniarlugu.

(Inatsisartuni ilaasortaq Jens NapātôK', Naleraq)

(Siullermeerneqarnera)

Qujanaq siunnersuuteqartunut siunnersuutaannut, Demokraatit sinnerlugit oqaaseqarfigerusutannut.

Uatsinni Demokraatini pingaartuuvoq, utoqqartatta pitsaasumik, toqqissisimanartumik ataqqinartumillu utoqqalinissaat qulakkiissallugu. Eqqaamassavarput, utoqqartagut inuunertik tamaat sulisimmata nunattalu ineriartorneranut pilliuteqaqataasimallutik. Tamanna nuannaarutigalugulu qutsatigissavarput. Taamaattumik pingaartuuvoq, utoqqartatta ataqqinartumik utoqqanngornissaat qulakkeertuassallugu.

Taakkuninga siunnersuuteqarlutik siunnersuuteqartut kissaatigaat, utoqqalinersiutit siunissami inummut immikkoortillugit naatsorsorneqartalissasut taamaasillutik aappaasup isertitai apeqquataatinneqarunnaarlutik.

Demokraatit tassunga isumamut isumaqataapput. Utoqqartagut inuttut ataasiakkaatut nammineersinnaasutullu isigisariaqarpagut. Utoqqaat namminneq aningaasarsiorneq sungiusimasimavaat inoqutigiillu inuuniarnerannut aningaasaatik taakku atorlugit pilliuteqaqataaneq sungiusimasimallugu. Aaqqissuussaaneq ullumikkut taamaatsillugu, utoqqalinermi pensionisiat apparneqartarput aapparisaat isertitai tunngavigalugit, inuttut misiginarsinnaavoq, naammattumik inoqutigiinnut ilaqutariinnullu pilersueqataajunnaarluni. Misigisimanarsinnaavoq, aapparisaat isertitai inuussutigalugit. Aapparisaat isumalluuteqartut. Tamanna ataqqinninnerunngilaq, taamaattumik aaqqissuussamut suliniuteqartariaqaraluarput, utoqqalinersiat aapparisaat isertitai malillugit naatsorsorneqartarnerannik malittarisassat atorunnaarsinneqarnissaannik.

Danmarkimi qanittumi malittarisassat taakku allanngortinneqaaqqammerput imaasillugu, 1. januar 2023-imi imaalerluni, pensionisiat aapparisaat isertitai aallaavigalugit naatsorsorneqartarunnaarlutik.



Oqarusuinnarlungaana, isumassarsiatsialaasoq, atulersinneqarnera aammalu piffinni allani atorneqalersimasoq.

Siunnersuutit ukuninnga oqaaseqaatitalerlugit Ilaqutariinnermut- aamma Peqqissutsimullu ataatsimiititaliami suliareqqinneqartussatut innersuussutigaaqut.